

皇明疏議輯略

皇明疏議輯畧卷廿九

禦邊三 北虜

備邊事宜疏

董越

臣聞中國之與夷狄猶天冠地屨其分截然是以古之王
者雖曰以不治治之然於其桀驁不庭化導不服者未嘗
不示之以威若高宗之於鬼方宣王之於玁狁是已洪惟
我國家自太祖高皇帝受天明命統一華夷太宗文
皇帝潛龍幽燕深知夷虜入正大統屢出巡邊當時西北
諸胡聞風畏却施及昭宣遼鄙無警夷狄之衰古未有也
比于先帝始復北狩然賴皇天眷德虜酋悔禍不踰年

遂固封疆 皇上嗣統以來懷柔備至然大羊常性雖在
馴擾而齧觸不忘所以年著有伺諸路之擾西有河套之
憂遼陞爲之絡繹宵旰勞於今慮王師縻於薄伐供億費
於轉輸較之 祖宗以來事勢又似有不同者豈夷狄昔
衰而今盛耶臣常推原其故矣曩時各邊諸將多勲閱舊
臣其遇敵決機臨危制勝皆嘗親經指授而深爲夷狄所
知及所敬悻況其在邊日久威信素孚人樂爲用今父死
子繼惟膏粱是習而譟畧罕聞聲色是娛而軍士罔恤夷
狄啟釁此其一也曩時王師薄伐雖六軍貔虎之士無不
在行然未嘗不參用土著蓋其人生長邊郡習聞戰鬥山

川險易皆其所知夷虜強弱皆其所料今番直之兵南人
過半性多輒怯體不耐寒視風沙刮面輦鼓震天不免喪
氣一與戰輒爲所輕夷狄啓釁此其二也 祖宗以來
凡出師饋餉雖飛輓居多然屯種之利亦所不廢且以一
卒之食一升一馬之芻數束曠日持久其費無窮陸輦車
輓其數有限以有限之資而給無窮之費雖有智數莫能
當之今屯兵一切不用而惟輦漕是資一或不繼則人馬
俱困夷狄啓釁此其三也 祖宗以來凡命將出師未嘗
不先之以信賞必罰其於功過或宥或罰務俾適中若
聖祖之待永成侯薛顯 太宗之不赦奉天征討有罪官

是已今軍中罰則太果賞則欠明況論功之人多徇偏弊
親冒矢石者或不沾寸賞托名行伍者或皆得全功遂使
軍士怨嗟不肯戮力夷狄啓釁此其四也其餘事勢或縱
於偷安或膠於一定或踈於控制或隱於上聞皆非 祖
宗以來所以制治馭戎之道故臣敢昧死條其事以聞其
一曰擇名將臣聞克敵之要在乎將得其人馭將之方在
乎操得其要蓋將之得人在乎儲養將之制馭在手黜陟
今邊陲名將可數不逾二三偏裨麾下勢或有之而名位
不著一有緩急將焉賴之且以近日西事論之都御史王
越等奏稱陝西延綏寧夏等處各報虜酋孛羅忽儿加思

蘭等糾率醜類潛住河套分掠剽掠已經四年在廷咸議
欲得一將位崇重威望素著者統制諸軍往番大舉朝
廷從其議以武靖侯趙輔元總兵未幾以疾賜還今之將
臣老忙不能皆一萬一遣者又如輔之有疾不知復以何
人代之臣愚以為乘今無事之時訪求各處有智勇綽畧
者聚之京師屬之各營委之以事以觀其智試之以戰以
觀其勇假之以權以養其威示之以褒以作其氣其見在
各邊偏裨以下曾著勞績者待之以不次必使如古名將
之流克塞中外則國勢自尊國威自立矣漢得一本廣屯
兵北邊而匈奴爲之畏却宋得韓琦范仲淹在真定環慶

而西賊爲之破膽用人以望此其驗歟其二曰增土兵臣
聞兵不貴多而貴精又曰古者戰其地用其人蓋兵既精
則一可當百而不費財刑其人則皆思顧家而肯戮力今
二邊之兵多出調遣其間南北風氣既殊人之勇怯自異
嘗聞之西征戰士有云往年滿賊背叛命將出師討之當
其負固不服數挑不戰之時其間土兵恨不得一飛往及
目覩烽火耳聞砲聲父子兄弟即私相慶幸以爲可以獲
利可以立功比至元惡成擒醜虜就縛太率皆出其鄉導
計畫坐困之功臣切料今之二邊事勢大率類此且河套
之地方數千里沙深水少欲直擣深入其勢甚難前後經

制之人但於東西中三路各設城堡一遇剽掠卽分投截
殺靜以待動於法亦宜但恐勢分難於制禦又聞近年各
堡官軍一遇虜來卽堅閉不出俟其將去然後追之名爲
截殺實類送行無他凡以畏怯故耳臣愚以爲除見在土
兵之外更多設法招誘擇其勇悍者隆以優養凡戰而有
獲悉以歸之功成則一體受賞願歸則縱而不禁如此則
兵必得精而財不虛費不患無可用矣昔韓琦嘗言京師
所以苦兵脆弱賊常輕之乞增土兵利其善戰元昊以此
遂不敢近邊用兵以募此其驗歟其三曰廣屯戍臣聞千
里裹糧士有飢色師旅未出饋餉居先今二邊連年用兵

百姓困於饋運四方苦於預徵雖曰成大事者不計小費
圖未逸者不惜暫勞然能寬一分則民亦受一分之益臣
請以往事言之漢特西羌先零屢爲邊患宣帝命趙充國
將兵擊之帝問充國用兵幾何充國曰兵難遙度願至金
城圖上方畧比上留屯之議廷臣皆以爲不便後卒以此
而坐困西羌然今河套可耕之地已盡爲虜之畜牧欲就
屯種斷無可能臣嘗以地里考之古之金城卽今之蘭縣
相去河西不遠其間充國之所疆理故蹟必然具存但不
知其地或民或戍且以一夫百畝論其穀粟既可食數人
其稿秸又可秣數馬較之饋運亦大不同况三時務農一

時講武又古之良法虜雖猖獗然春深水泮亦難飛渡其
北邊諸處有可耕者亦宜依此立法如此則兵食交足而
不費徵求矣昔晁錯請文帝募民耕於塞下而匈奴竟不
敢侵唐實靜諸高祖也田太原而歲收粟十餘萬斛豈非
其明效歟其四曰明賞罰臣聞誘人之方惟名與利又曰
有罪不罰雖堯舜不能治蓋賞罰國之大柄於出師尤當
重之近者二邊用兵而貪功冒賞者隨舉輒聞雖曰功疑
惟重不必過求然一於優容恐亦不足以致人之服臣請
以往事證之晉武帝泰始七年豫州刺史石鑒坐擊吳軍
虛張首級遂正其罰而不得受賞近者河套之捷亦不能

無類此者賴聖天子明見萬里再命履實遂使貪冒之風
由之頓消臣愚以爲自今征伐宜精選紀功官員責以連
坐必獻俘馘者乃得論功冒獲者一切不與杜權貴幕下
之私作六軍敢死之氣其失機喪師辱國者則寘於法不
爲已甚者則肆赦而責其立功如此則人皆思自奮不患
不得其用矣昔漢文帝赦一魏尚而雲中以寧唐高祖謂
李靖使功不如使過而突厥以擒又非其明效歟然是四
者皆今日備邊之急務若夫所謂不縱於偷安不泥於成
法不疎於控制不隱於上聞在乎將帥之得人耳將帥
得人則兵不必多餉不必久自無老耄之憂賞必當功罰

必當罪而無僭濫之失其於控制之法又何至有偷安執
泥而煩 聖慮哉書曰無怠無荒四夷來王詩曰式固爾
猷淮夷卒獲此之謂也

分布邊兵預防虜患疏

楊一清

黃河將凍虜賊雖未深入而禦備之計在我不得不嚴今
延綏定邊營迤西直抵寧夏靈州地方廣袤平漫既無險
可據而所在邊牆低薄壕塹淤塞又復不堪保障以致賊
每從此深入陝西環慶固原地方肆行搶掠上厯九重宵
旰之憂下貽萬民殺戮之患臣總制各路兵馬謹當嚴肅
號令分布主客官兵揚威耀武以伐其謀於未入之先出

奇設伏以乘其弊於將歸之際然須脫畧常法隨事達變
乃克有功且善戰者必知分合善守者必審常變我邊患
於兵多病於權分各據利便自分彼此扼可乘而不乘兵
當合而不合其輕率寡謀者則又知常而不知變往往墮
賊計中以致我武不揚狂胡肆志職此之由今將沿邊以
至腹裏分爲四路以定邊營花馬池興武營靈州一帶爲
籬籬以石溝鹽池韋州萌城山城一帶爲門戶以固原黑
水口鎮戎所西安州海刺都一帶爲庭除以安定會寧隆
德平涼一帶爲堂室行令延綏副總兵姜漢統領奇兵遊
擊將軍戴欽統領遊兵及安綏德衛指揮藍海管領土兵

各限十一月初十日起程遊兵暫於花馬營住劄奇兵暫
於邊營住劄土兵暫於寧夏總兵衙門統領
新兵官軍於興武營都指揮韓斌統領土兵於清水營亦
限十一月初十日到彼駐劄賊果入套西行延緩奇兵移
至花馬池量分與安定楊柳二堡土兵移至定邊營量分
與鹽場三山等堡各連絡住劄與分守各將葉椿閻綱協
同指揮保勳等振揚威武併力防禦以壯藩籬寧夏總兵
官李祥統領前鋒奇正官軍先期至靈州有警移至石溝
分守寧夏西路各將馮模統領寧夏市衛廣武營選先鋒
奇兵官軍前至高涼州陝西遊擊陳善領兵於韋州環慶

守備都指揮馬震領兵於山城各住劄以嚴門戶鎮守陝
西署都督公事曹雄統兵於鎮戎所調度固原靖虜蘭州
一帶主客官軍以保庭除仍預行甘肅遊擊將軍徐謙統
領甘涼官軍并千魯經土客兵各於莊浪操候河套有警
調至安定會寧與甘涼備禦下班官軍并謀齊力以守堂
室由是分布既定沿邊守將嚴謹斥堠遠爲接哨多設唐
馬但有烟塵消息或回人傳說即便轉唐走報隣境官軍
提備賊果近邊各土客官兵分據要害占守水頭從宜阻
遏寇小至則擊之不可輕進遠追仍要互相應援不許自
分彼此如賊大至謹勿與之爭鋒各取便歛入城堡以避

之待其擁衆深入延綏遊奇土其寧夏副總兵都指揮韓
斌等二枝人馬各襲踪而進若犯固原陝西遊兵即便掣
回應接李祥衛勇馮積韓斌等各領兵于紅寺兒堡按伏
姜漢戴欽藍海等各於韋州鹽池石溝按伏環慶官軍移
至萌城各休兵秣馬以逸待勞曹雄相機調遣腹裏官兵
據險以扼其衝張斌以分其勢一面馳報安會靖寧官軍
堅壁清野勿露形踪多用鄉導截兵於崖窰堡洞險要扼
塞之處伺賊分散搶掠出其不意發兵擊之賊旣不得逞
必將曹雄陳善重兵衝其腹心又與徐謙遊兵俱襲踪而
出北至紅寺兒石溝鹽池等處延寧環慶官軍分據營盤

待其前鋒稍遠先後犄角夾而攻之陝西主將遊兵出其
後背奮迅逐之晝則追鋒以截其路夜則卸枚以劫其營
賊深入疲弊又腹背受敵必大遭衄挫若犯環慶則延綏
遊兵官軍掣到紅德堡山城會合陝西遊兵羣龍截殺倘
因事情急迫都督曹雄領兵自三角城沙井溝而出寧夏
主副將官兵馬掣至萌城甜水堡以遏其破喪西走之勢
賊旣散走其氣已奪諸軍仍躡其後併力追勦至邊牆而
止沿邊主將官閻綱保勦等以逸待勞或邀其中或截
其尾以我西路應敵之兵當役千里趨利之賊豈有善歸
之理如此庶可以振中國之威褫外夷之魄爲今之計似

不出此然兵無常形敵有萬變隨機運用難以預度因時制宜又在各官今延綏遊奇土兵旣皆掣至西路其中東二路城堡空虛倘賊乘隙而入其爲患非輕已行延綏鎮巡官照例徵調大同遊奇官軍先期於交界去處往劄賊果入套調來中東二路應援截遏如賊衆在迤東近邊折墻謀犯延綏地方卽將本鎮遊奇兵掣回若賊緊急寧夏陝西遊兵俱同調去策應臨時斟酌定奪凡客兵所至之處在陝西地方聽曹雄節制在寧夏地方聽李祥節制在延綏地方聽張安節制俱不許偏執違拘致悞事機則旣先實戰勝攻克兩無慮矣

預處兵機疏

楊一清

據延綏總兵官張安稱近年以來虜酋驕橫勢甚猖獗輒入腹裏諸鎮被其蹂躪地方盡皆殘毀若不預爲處置使其痛遭挫衄則邊患何時可息地方何時獲寧始必待虜仍前恣意侵掠不拘何鎮探聽聲勢選定馬步官軍住守先遣人出境密切哨探賊巢遠近酋虜多寡然後將馬步官軍分爲左右哨掖步軍駕御兵車隨同出境挨邊劄營作爲家計聲勢連絡遙振兵威馬軍晝伏夜行徐徐前進約至賊巢分兵齊起驚撒散亂擒拿老小剿殺強壯邀趕生畜使深入諸賊得知前後不顧急趨回營見其巢破營

空無所顧藉加之腹裏官軍追擊內外夾攻手足無措未免菟喪膽落號哭奔避再不輕犯虜乎內外軍民得以安妥臣愚以爲虜酋自弘治十三年延綏大同官軍失利之後志驕氣橫肆無忌憚弘治十四年深入陝西腹裏殘害生靈動以萬計弘治十八年宣大遊兵全無後役又河凍之後連年窺伺陝西旣未遭挫必無懲戒今冬踏冰入套之舉難保必無旣入河套必不安靜臣方部署將士振揚威武已將延邊直抵腹裏分爲四路布置主客官軍相機邀截但兵少備多未免一以當十出奇制變事不得已前項撲搗巢穴之意不爲無見臣非不知來去戰守乃禦戎

之常道犁庭掃穴非聖王之本心然商高宗之伐鬼方唐太宗之擒頡利是非薄伐昭然可知况河套本我內地而彼據以爲巢此田中之禽利用搏執固非稱兵於陰山之窟洩血於不毛之地喜功好大者之所爲也臣愚以今冬深河凍賊果入套宜徵調宣大二鎮遊奇官兵於延綏中東二路往劄並聽張安節制若止在套駐牧未嘗擁衆內侵則嚴兵自守决不輕敵自起邊釁如仍前深入固慶等處搶掠行令延綏鎮巡官一面選人分投出境哨探賊營遠近衆少一面會合主客官兵預先分布逼近虜營城堡如在一二百里之間有機可乘則原擬沿邊中路邀截之

兵照舊不動以延緩東路叅將時源所領本鎮三路軍馬
與臣近日挑選先鋒奇兵官軍三千名以爲馬戰總兵官
張安領本鎮選定頭撥等官軍三千名次之以爲中軍大
同遊奇兵馬左右二哨及宣府遊奇兵又次之以爲外援
太監劉保都御史文貴領本鎮兵馬并本隊官軍於牆外
二三十里列軍爲家分布得宜晝伏夜行各相去二三十
里擇形勢利便之地爲營以待務使聲勢連絡前後相望
我兵旣近賊壘奮勇疾進衝其腹心賊旣潰亂拾其羸老
而戮其壯健奪其鎧馬而縱其牛羊大同之兵整整嚴備
不許貪利輕動前鋒勝負未決恐無聲援必待其旣回以

爲羽翼賊若糾衆余孽尚集我軍張安合大同之兵專爲
殿後宣府官兵相機爲援我雖退而兵漸增彼旣遠而勢
自屈前軍勞而退則先行使無繫累後軍逸而回則殿後
使有餘力如此布置較之先年出境分布踈遠孤兵無繼
訖難成功者不同彼賊千里趨利日久疲弊聞我傾其巢
穴必自遁歸我腹裏之兵躡之中路之兵劫之沿邊之兵
又夾而邀之賊戀巢之心旣勝欲戰之志不堅必然潰敗
比至套內見其妻孥傷殘褫魄破膽振中國之威洩生民
之憤安邊制虜之計莫快於此昔者孫臏直走大梁而解
邯鄲之圍攻其所必救古人遺法具在顧用之者何如耳

但兵貴神速機防先露進退之際間不容髮乞 勅兵部
詳議可否急賜施行

經理要害邊防疏

楊一清

臣看得應築邊牆自延綏定邊營迤東右勝池地界起至
寧夏地方橫城止共三百沿途舊墩臺七十一座間多填
塞平漫止存形踪獨與武營清水屯卜剌紅山四堡切近
邊牆易於防護其餘大小城堡俱各離邊絕遠聲勢隔越
且墩臺窄淺牆垣低薄墩臺稀疎節被達賊窺伺牆裡既
無大兵阻遏牆上又無官軍拒敵賊衆填溝而進掏挖邊
牆一旦可開二三十處本處官兵自保不暇安能截勦墩

軍惧其攻宐往往棄墩而逃烽火不接縱使徵召客兵前來應援而牆外俱平漫廣衍黃沙白草彌望無際賊衆動稱數萬我軍衆寡不敵無險可據難以遏其初來之鋒賊旣入境馳驟長驅一日夜可至固原無復邀阻連年失利藏此之由爲今之計必於舊牆內外葺築高厚牆外每里添築墩臺三座每座相離一百二十步傍牆於空闊要害有水去處增添小堡高厚丈尺畧與邊牆相等墩臺去處仍酌量添築墩臺牆外壕塹批濬極深對敵臺墩百座煖鋪墩百間每間用五人守之該用軍肆千五百名無事之時堅守舊墩尤必設治柳鈴廣張旗幟聯絡相應仍分委

官員各定鋪分護守叅將協同守備官各照所轄地方提調虜賊若果入套仍前窺伺侵犯原擬徵調延綏遊奇土兵及寧夏副總兵等人馬各於定邊花馬池興武營清水營靈州等處往劄各分兵于新舊小堡內按伏策應其間應合事宜又在臨期調度如此則邊備嚴密威武振揚足以伐其邪謀不敢輕易進墻若仍前填壕進墻官軍出列墻上敵臺兩邊鎗砲矢石攻擊賊徒愈衆則傷愈多步兵擊之於上騎兵待之於內其鋒必阻其氣必傷虜賊遠來利於速戰入境無策勢必遁歸縱使結聚攻圍受敵不支然相持之間未免少延時日烽火傳接環慶固原一帶人

畜可保無失又不得已則我邊兵姑飲入大小城堡以避其烽賊果深入速將拆牆口補塞量留官軍堅壁固守各挑精兵襲踪而入陝西官軍撓之於內俟其將遁躡蹤而出延寧精兵邀之於中沿邊官軍拒之於外賊雖梟雄豈有善歸之理就令小有侵掠比至邊牆我軍仍用鎗砲矢石攻擊勢必潰亂諸軍乘之縱不能使其匹馬不前亦必大遭挫衄可保數十年不敢入套犯邊經畧之計宜無出此但興此大役未免勞人費財則必行據所司量撥人夫以時調度應用動支賑濟銀兩以備召商上納誠計之得也臣又看得延綏地方寧塞營之東有險可據賊難馳突

寧塞營迤西至舊安邊營舊安營迤西至定邊營各九十里川原平漫與花馬池地方相類既無邊牆雖有溝塹二道俱爲沙土壅塞萬騎馳聚不能阻遏前此達賊每從此拆牆深入取其捷徑今若將花馬池一帶邊防整飭完固萬一黠賊自定邊安邊之間擁衆而入西向花馬池邊牆以裡地方自西而南不過稍迂百餘里則脩邊工程歸於無用又必將安邊營迤西石澇池地界至寧塞營迤西地界止共長一百六十三里三百四十五步內平漫堪以築牆挑壕者一百三十一里三百四十九步山崖險峻堪以剗削者二十一里三百五十六步責成巡撫都御史照依

所擬應築牆者築牆應剗削者剗削務使沿邊有備腹裏無虞乃爲萬全之謀至若寧夏一鎮西有河山之險東無溝岩之阻西路設立寧夏中路一衛東路止是新設花馬池守禦千戶所以爲偏重況虜賊大舉必從東路而入不惟無險可恃實因兵力單寡賊至境上每仰客兵應援近年徵調官兵失時後期訖無成功合將花馬池守禦千戶所添設一衛除本所外再添四所共五所與武營相離花馬池一百二十里地勢孤懸急難應援止是備禦客兵戰守不足合添設守禦千戶所照依延綏事例委把總官一員提調防守新設衛所合用官員於陝西都司官多衛分

摘調其旗軍於寧夏及靈州東西三路新舊石募額外土
兵內摘撥有警之時專以守城守牆守墩無事之際還裏
閒田任其開墾以近就近且耕且守如此則勢不偏重而
邊牆可久兵皆土著而人情可安臣愚又以靈州千戶所
北臨廣套西控大河寧夏之襟喉中原之門戶原領土漢
馬步官軍四千八百餘名備禦西安右護衛官軍七百五
十餘名所管地方東至萌城北至興營方數百餘里大小
城堡二十餘座誠爲達賊出沒重地靈州不守則寧夏隔
爲外境環虞勢孤無援無虞則無陝西矣今內有土民
四里并土達軍餘六百戶俱係洪武年間山後等節次歸

附人數我祖宗嘉其誠款而羈縻之給與田地草場使其耕牧後因有警土人自備鞍馬出力報效累有斬獲此虜畏之近來所司不知存恤草場被人侵奪馬匹走站死不追陪虜賊外侵科差內擾人畜耗彫死徙居半臣頃者巡邊閱視彼處地方城池壕塹一切兵政但因守備非人悉皆廢弛夫以寧夏地方如此邊務如此人情如此上無有備之形下有可畏之勢今不預爲之所將來若有內變不止虜情當慮而已傳曰不見是圖況機緘外見已非一日之故耶又據漢土舍餘軍民劉谷等告稱靈州相離寧夏動經百里隔越黃河本所月報循環糧草軍務等項

俱寧夏一衛提督或有聲息河渡阻隔該後官吏經月不
回又兼本衛不時遣人來所騷擾告乞復設守禦千戶所
衙門查得靈州洪武年間原設守禦所徑屬陝西都司後
因差用不敷奏革守禦名目隸寧夏衛帶管其餘土民亦
屬寧山衛經歷司帶管路阻黃河科差拘擾添爲不便昔
撫臣奏該州治建學立師誨訓土官子弟用夏變夷似亦
有理但以寧夏軍餘改投編氓未免損此益彼近又革去
州治以隸寧夏衛分夫州治固不可設緣本所軍既不足
官有剽冒復守禦之舊當無不可且官軍愈多則害愈大
靈州軍民其有爲害而寧夏之人則因以爲利貪豪恣肆

上下交征裁暴強安無所控訴必須復設守禦專令憲臣
一員在彼住劄庶幾宿弊可革土人獲安但陝西按察司
憲臣已多若有添除又啓官多人擾之議及查環慶兵備
副使止管慶陽一衛事務甚簡况復兼理靈州塩法慶陽
相離大小塩池各數月之程實難運制靈州相離塩池不
遠易於提調乞將靈州千戶所改設守禦千戶所徑屬陝
西都司土民聽本所吏目帶管將環慶兵備改整飭環慶
靈州等處兵備自環慶迤西寧夏花馬池興武清水營直
抵靈州一帶俱聽約束常在靈州住劄操練軍馬問理詞
訟撫安土人禁革奸弊無理靈州塩課司大小塩池塩法

仍聽陝西寧夏巡撫節制如此而又委任得人則軍民免
十羊九牧之擾土民有趨利避害之望而一帶地方邊備
錢糧有所稽考不爲無益臣又看得常州地方廣衍平漫
四通八達乃虜寇出入要衝正宜高城深池戒嚴武備潛
息窺伺之患今乃坍塌廢弛守既不嚴戰又無矢倘虜寇
擁衆攻圍則城內生靈憑何保障腹裏人民必致驚擾況
密邇螺山慶府墳塋所存弘治年間大虜入寇多在螺山
住宿近日被人將慶恭王墳掘發言之痛心若不重加修
理添設常備之兵則日後貽累恐不止此查得寧夏中護
衛軍旗除選調廣武營鳴沙州操備外見在官軍餘五千

三百二十二名儀衛司旗校舍餘一千一百九十七名俱
在本州別無差用比之秦肅二府大有不同若將此屬摘
發常州設法操守保障地方衛護增營最爲長便且秦肅
二府官軍旗校千里赴邊備禦今以慶府擁衛之人保其
先王肢體之地體國之忠奉先之孝大義兩繫自難他辭
合委官挑選管領操習與辟牧十戶所官軍相無防禦則
虜騎經行有所忌憚不敢恣肆腹衷人心有所繫屬不敢
搖動臣又行據委密叅政安惟學僉事胡經各稱靈州橫
城以西北抵黑山營鎮遠關係寧山通賊要路我邊防嚴
備旣不能入花馬池必將從此踰河任意寇掠河西城堡

雖有官軍數亦不足不能阻遏合將橫城以北直抵鎮遠
邊牆墩塹一體紮築挑濬黑水營先屯人馬後因路遠廢
而不守今河東邊防既嚴虜必從此入境宜入黑山營仍
屯兵按伏又寧夏邊牆至黃河東岸今築橫城而止恐虜
賊知我邊牆高厚不能掏挖冬深河凍於牆盡頭處踏冰
自西仍謀入寇未審河西城堡兵力堪否得禦臣按圖考
用廣詢博訪寧夏橫城北黃河東岸舊有邊牆一百八十
五步墩塹一道高厚深闊悉如花馬池一帶城塹之數自
南而北有長城十八墩後守臣恐其稀疎每墩空內添設
一墩共見在墩臺三十六座牆裏套內地方又設石甬暖

泉二墩瞭守其第十八墩與河西黑山營鎮遠關相對每
年於黑山屯聚人馬阻遏虜騎以爲寧夏北門鎖鑰前人
綜理周密深有所見節因寧夏守臣怯懦河東墩軍累被
撲捉既將石甫暖泉二墩廢棄遂將新舊三十六座墩臺
俱棄而不守乃於河西築立墩臺一十三座由是套賊多
寡遠近緩急全不知覺又因黑山營曾被虜賊攻圍遂將
官軍移至平虜城由是平虜城爲極邊要害居民往往不
得耕牧殊不知撲捉墩臺窺伺城堡乃虜寇常事顧吾所
以待之如何耳吾能往彼亦能往我退彼進自然之勢今
河東墩臺既不可守使賊乘凍渡河則西岸之墩獨不可

掘空于黑山營有備則平虜爲腹裏今廢黑山營而不
使賊近窺平虜亦將併廢之乎是皆不通之論也不論
池一帶邊牆旣欲封築又於盡頭橫牆之南添築一堡
屯兵馬防禦河開之後縱有套賊不能爲患但恐冬深河
凍踏冰而西仍謀入寇容或有之意外之防不可不謹然
則河東三十六墩邊牆墩臺宜封築脩濬撥軍守瞭與
河西墩臺煙火相接至於河西黑山營誠宜挑選精銳人
馬於此屯宿按伏以爲平虜聲援則封守慎固而地方可
保無虞矣

邊防議

王瓊

瓊集諸將議調固原兵亦赴花馬池與延寧兩鎮兵會合共三萬擺邊拒賊衆以爲待賊深入乘其散搶設伏遊擊或可得利若在花馬池擺邊賊初至數萬結營擁入勢如山壓其鋒甚銳不可當先年官軍在彼阻截被圍失利瓊曰往年賊大舉深入官軍分布腹裏未有能邀之者惟嘉靖五年六月賊入不及二千官軍二萬邀擊以十敵一是以克捷今賊必以此爲戒必擁衆數萬而後敢入乃欲僥倖如前克捷豈可得乎且花馬池東西賊路不過三里既過下馬房東西南北道路二千餘里賊隨所至掠取積粟牛羊食用我軍出百里之外糧草匱乏士馬飢疲自不能

戰審此兩端勝負已分何待臨敵而後知乎又兵法當識
地利據險要以逸待勞今集兵三萬據邊牆營堡守之縱
不能與戰取勝豈遠爲賊所攻陷乎兵守既固賊豈敢肆
意長驅不顧所掠之畜產乎遂統精兵六千啟行餘兵四
千留固原操練聽候取調六月初九日至靈州適橫城堡
在靈州北七十里黃河東岸邊牆盡頭收送虜中走回男
子楊通備言在虜營見達子打造鈹鏃弓箭說到七八月
要來腹裏搶掠及脫走到邊見達子一群在外行走本堡
官軍由黃河岸過邊邀馬入堡凡三十二匹十二日兵趨
橫城時遇南風順行金鼓火炮聲數十里塵飛漲天沿河

岸牧馬虜賊於牆外沙磧望見大兵至盡起營帳北去十
三日自橫城東南循牆而行歷清水與武定安三營堡十五
日至花馬池延綏諸將皆來會瓊諭之曰汝等遇虜大舉
擁入既以爲兵寡不敢迎敵又輕騎數千時入掠剽勞我
士馬窺我虛實汝等又諉曰賊隨入隨出亦復不能勦殺
必待如何而後汝等之志得行乎自今虜賊輕騎入牆不
設備擊殺定以軍法重治衆將皆曰諾二十二日虜賊一
百餘騎到定邊營安靜二墩拆開牆口二處刺賊十人披
帶盛甲突入牆口卜雲預令步兵伏牆下見賊入即趨牆
口截之賊躍馬南奔卜雲帥精兵追擊盡斬之牆外賊登

望見賊被殺號哭遁去瓊令諸將操演擺牆拒戰之法衆
曰今大兵聚花馬池一百五六十里賊分路進入柰何瓊
曰汝等生長邊方尚不知地利虜情乎今河套地方千里
虜數萬入居其中趨逐水草四散畜牧欲大舉南寇則令
傳示諸部落晒乾肉收乳酪約日聚集以候進既集衆至
二三萬夜宿火光連亘數千里我之數軍夜不收瞭望先
知我兵可先至牆設備矣又虜衆臨牆上宿必就有水泉
處安營飲馬今花馬池牆外有鍋底湖柳門井與武營外
有蝦蟆湖等泉定遠營牆外有東柳門等井餘地方無井
泉又多沙凹凹或產蓬蒿深沒馬腹百騎或可委曲尋

路而行若馬至數萬匹必顛仆勞乏不得整驅並轡而行
是以往年虜衆大舉必由花馬池平坦道路有水草之處
結營而入或自興武營清水營入者間亦有之因出地圖
指示之圖中備書某年月日賊幾萬幾千從此地某墩空
拆墻口幾處入自弘治十四年以來無不自花馬池邊入
者衆方信花馬池爲要衝七月巡撫榆林都御史蕭淮來
會勞軍將別請問曰外議皆云自來未有擺邊可以拒數
萬騎虜去者公千金之軀親臨督兵任其事乎瓊且以方
畧告且請發佛郎機大砲助用淮曰其未足以知此有所
聞不敢不告願公自愛時鎮守陝西太監晏寵巡撫都御

大寇天叙發精兵三百助戰寇天叙又備烘炒三百石運至花馬池并令各軍自備人給三升惟石臼墊墻下二十餘里無井令兵班行都指揮劉揖掘三井水井冽可飲又定步軍五百待兵至墻下於花馬池城外井運水供軍諸將演營以定瓊急未得法七月十六日令諸將詣石臼墩墻下安營親往視之令人作賊於墻外舉旗諸軍登墻點放神鎗打之瓊急呼下墻曉之曰凡行營必掘塹或立挨牌拒馬椿以限賊馬今所以擺墻者足爲我兵障蔽也賊登墻拆毀我兵於墻內用火器擊之彼豈能不墜落乎今墻上僅容一人單立而乃令我軍登墻持神鎗打之賊自

城外射之一矢斃矣微吾來幾壞事遂教演擺牆敵戰之法衆始稱善又令曰如賊大舉從東西別路入則我兵三萬結爲三大營依花馬池南北布列賊必於此三營經過各堅壁勿與戰待賊行動用神鎗銃砲大佛郎機砲出奇邀擊破之必矣昔李康步兵三千轉戰單于數萬今我精兵三萬火器三千而畏敵如虎豈將帥皆婦人乎初諸將聞令退有後言至是三令五申選猛士三百人各持大刀命執令旗令牌者領之誓曰自今出軍遇賊敢有逗遛退缩者即於陣前斬之故不倉卒策應失誤軍機者秦械繫赴京依律坐罪衆方悚息聽受次日率萬騎東巡處邊營

又至舊安邊營復回花馬池往返三百餘里塵飛漲天旌
旗蔽野金鼓之聲聞於境外遇有狐兔野羊因圍獵之蓋
奉天子之命以令將士所以威靈氣焰能赫赫也或曰
既集大兵宜不露形賊入可獲奇功奈何揚兵使避去徒
勞士馬而無功乎瓊曰禦戎之道以守備爲本不以攻戰
爲先且夫聚兵三萬月費千金利於速戰若潛師以待賊
或不來久之師老食盡兵悉罷散而賊乃擁至豈不失策
乎是時駐兵之處糧多缺陝西一省大旱米貴惟寧夏一
區賴黃河水利頗有收穫都御史劉天和自甘州無程來
六月到靈州即議於寧夏靈州倉該放軍軍月糧數內增

價糴運巡撫寧夏都御史翟鵬以謂宜如弘治十四年故事空運八府之粟而不獨取給於寧夏一區也禁勿許糴然官軍利於價增皆樂從之鵬不能強每運糧一石官給腳費銀一錢二分七月終已運至花馬池麥豆二萬六千石矢草亦間有折色聽軍隨營牧放軍餉賴以不乏小民不受追逼寧夏鎮城至花馬池三百餘里運糧者循邊墻而行騾馱車輓晝夜不絕一日早賊虜五騎至與武營暗門墩下問敦軍曰我是小十王吉囊俺答阿卜孩差來邊上哨看你墻裏車牛晝夜不斷做甚麼答曰總制調齊十萬人馬饋運糧草勾用要搜套打耐帳房賊曰套內多達

子有裏打不的又言我原是常州人與你換弓一張回去
爲信墩軍曰你是常州人何不投降賊曰常州難過草地
自在好過我不投降舉弓送牆上墩軍接之不換與弓賊
遂放馬北奔弘治十四年侍郎李繼督餉令八府所屬百
餘州縣遠至二千餘里空運米豆赴邊全省騷動而大虜
不能深入驅掠今天和取給於近地所產軍食足而民不
擾誠可爲後來督餉者之法也瓊初議出兵調取各鎮節
年虜中走回男子熟知虜情者數十人充爲通事至是令
尤乖覺者十數人各執招降紅旗深入草地插之中國人
被虜識字者見之拔旗去投降者不絕以此得知虜遠近

進止消息又令人投毒藥於近墻水泉又每五日輪遣夜不收數十人晝伏夜行深出哨探百里之外無營帳往牧一日十餘騎夜至墻下墩軍拒之一賊先入爲守墻指揮楊宗所殺又一日賊二十騎夜至柳楊堡墩下拆墻入守堡官領步兵用神鎗擊一賊隊馬守堡官下馬爭割首級一賊後射之傷死賊扶死者馱馬上疾走出口步軍追之不及是後再無一賊至墻下者九月初一日忽有遊擊梁震差舍人李聰自榆林回報說東邊虜中走回人口說大勢達子在西下營不久要往大同西邊搶掠瑯白此賊知花馬池一帶有備而欲乘虛西搶靈州屯田村莊也時固

原遊擊彭械兵住小鹽池遂差百戶張天福齎執旗牌急
調彭械遊兵來靈州與守備安正兵設備械初六日到靈
州十一日夜達子二千餘騎到於清水營鎮北墩西空拆
開墻口一十處南趨靈州張天福督彭械等夜出兵陣於
靈州城北時劉天和在靈州召彭械等戒之曰賊夜入未
知多寡宜慎重如總制軍令以拒賊出境保障居人爲上
策不以多斬首級爲奇功彭械等遂肅隊而行黎明時約
行二十餘里至地名王鉄廟遇賊前鋒一千餘騎皆披帶
鮮明盔甲張打旗號驟馬衝突而來餘賊一千餘騎隨進
我軍奮勇各用火器神鎗火砲弓箭骨朵回前交鋒混戰

二三十合賊傷死者甚多俱被扶拖而去戰至辰末時分賊方退遁至原拆墻口遇遊擊李勲人馬來拒敵不得出又望見東路茫馬池大兵灰塵遂西往木井墩東空拆開墻口一十一處奔逸出境靈州也堡悉得保安時梁震差家丁出口哨見忻都城離邊墻一百餘里有賊營帳三十餘頂在彼瓊曰此賊近地安營雖未必深入不可不計逐命諸將團聚精兵萬騎夜出襲之或曰有例不許官軍出境殺掠瓊曰禁例所載謂守邊將帥不得私自使令軍人出境擄掠財物也律不云乎若邊境城邑有賊出沒乘機領兵攻取者不在此限今吾奉天子命專征開外襲殺近

地幾伺之賊有不可邪如盜伏人家垣門之外主人知之
不即號呼隣巷共逐之而必待其毀垣破門然後拒之乎
昔李牧守鴈門匈奴不敢近塞以嘗殺其近塞者故不敢
近耳若非殺之安能使其不敢近塞乎衆將皆謂不及如
此願依令出襲九月十五日致祖道供帳於花馬池南門
外約定酉時出兵度暮至花馬池東北二十里拆牆出親
臨戒之曰暮夜出兵襲賊賊少兵多慎勿輕敵分散邀斬
首級至有損失此惟欲宣威沙漠使彼遠遁耳諸將皆諾
萬馬夜出嘶嘶之聲聞十餘里賊遂起營北遁常軍至忻
都城寇灰尚未冷遂放火砲納喊而回天明入牆自是差

人相繼出哨二百里之外無賊踪矣論曰胡人以畜牧爲生騎射爲業侵暴邊境出沒無常大舉深入動至數萬歷代以來屯兵戍守寡則艱于應敵多則困于轉輸是故虜衆一合而勢常強我兵難聚而勢常弱惟其弱也故有與之和親爲之納幣而不耻者其甚至於偕沒疆土臣事犬羊如五胡亂華蒙古滅宋夷狄之禍于斯極矣若夫英勇之君憤夷狄之侵凌竭天下之財力兵窮力疲而後已皇上明見萬里嘉納先行諄諄戒諭務底成效前後巡撫都御史寇天叙劉天和巡按御史王儀朱觀謀議協同鎮守陝西都督劉文躬親督理副使齊之鸞張大用身任其

賁之弟尚書李承勛主張敷奏乃於化馬池一路長三百
里爲之深溝高壘以立大險限隔華夷又於環縣北甜水
堡西至靖虜關州長八百里塹山湫谷以爲重門慎守封
固自時朕後北虜將不得長驅深入而地內人民可以安
堵息肩矣至于甘肅一線之地長千五百里羌虜焚居山
勢曠遠中間可以設險之處固有而難以設險處居多漢
宣帝命趙充國將兵討羌充國奏留步士萬人屯田部曲
相保木譙高樓交聯不絕營壘相次便兵弩飭閉具烽火
相望合勢併力以逸待勞兵之利者也今日守甘肅之臣
惟以克國爲法斯得上策矣

前歲經畧河西奏乞遵古

法重屯田以備戰守已施行矣然而尚不見成效者屯田之難必須遲之以歲月而又得人以分理之庶乎其有成也

陳言邊務疏

王守仁

邇者竊見皇上以彗星之變警戒脩省又以虜寇猖獗命將出師宵旰憂勤不遑寧處此誠聖主遇災能警臨事而懼之盛心也當茲多故主憂臣辱孰敢愛其死况有一二之見隱忍不以上聞耶臣愚以爲今之大患在於爲大臣者外託慎重老成之名而內爲固祿希寵之計爲左右者內挾交結蔽壅之資而外肆招權納賄之惡習以成

俗互相爲好惡世者謂之迂迂進言者目以浮躁沮抑正大剛直之氣而養成怯懦因循之風故其衰耗頽塌將至於不可支持而不自覺今幸上天仁愛適有邊陲之患是憂慮警省易轅改轍之機也此在陛下必宜自有所以痛革弊源懲文而振作之者矣新進小臣何敢僭聞其事以干出位之誅至於軍情之利害事機之得失苟有所見是固芻蕘之所可進卒伍之所得言者也臣亦何爲而不可言之有雖其所陳未必盡合時論然私心竊以爲必宜如此則又不可以苟避乖刺而遂已於言也謹陳便宜八事以備採擇一曰蓄才以備急二曰舍短以用長三曰簡

師以省費四曰屯田以足食五曰行法以振威六曰敷恩
以激怒七曰損小以全大八曰嚴守以乘敵何謂蓄才以
備急臣惟將者三軍之所恃以動得其人則克以勝非其
人則敗以亡其可以不豫蓄哉今者邊方小寇曾未足以
辱偏裨而朝廷會議推舉固已倉惶失措不得已而思其
次一二人之外曾無可以繼之者矣如是而求其克敵致
勝其將何恃而能乎夫以南宋之偏安猶賴宗澤岳飛韓
世忠劉錡之徒以爲之將李綱之徒以爲之相尚不能止
金人之衝突今以一統之大求其任事如數子者曾未見
有一人焉一霸能長驅而入不知陛下之臣孰可使以禦

之若之何其猶不寒心而早圖之也臣愚以爲今之武舉
僅可以得騎射搏擊之士而不足以收韜畧統馭之才今
公侯之家雖有教讀之設不過虛應故事而實無所裨益
誠使公侯之子皆聚之一所擇文武兼濟之才如今之提
學之職者一人以教育之習之以書史騎射授之以韜畧
謀猷又於武學生之內歲什其超異者使之相與磨礪砥
礪日稽月考別其才否比年而校試三年而選舉至於兵
部自尚書以下其兩侍即使之每歲更迭巡邊於科道部
屬之內擇其通曉特達者一三人以從因使之得以周知
道里之遠近邊關之要害虜情之虛實事勢之緩急無不

深諳熟察於平日則一旦有急所以逕度而往蒞之者不慮無其人矣孟軻有云苟爲不畜終身不得臣願自今畜之也何謂舍短以用長臣惟人之才能自非聖賢有所長必有所短有所明必有所蔽而人之常情亦必有所懲於前而後有所警於後吳起殺妻惹人也而稱名將陳平受金貪夫也而爲謀臣管仲被囚而建霸孟明三北而成功顧上之所以駕馭而鼓動之者何如耳故曰用人之仁去其貪用人之智去其詐用人之勇去其怒夫求人於倉卒艱難之際而必欲拘於規矩繩墨之中吾知其必不克矣臣嘗聞諸道路之言襄者邊關將士以驍勇強悍稱者多

以過失罪名擯棄於閑散之地夫有過失罪名其在平居
無事誠不可使處於人上至於今日之多事則彼之驍勇
强悍亦誠有足用也且彼擯棄之久必且悔艾前非以思
奮勵今誠委以數千之衆使得立功自贖彼又素熟於邊
事加之以積憤之餘其與不習地利志圖保守者其功相
遠矣古人有言使功不如使過是所謂使過也何謂簡師
以省費臣聞之兵法曰日費千金然後十萬之師舉夫古
之善用兵者取用於國因糧於敵猶且日費千金今以中
國而禦夷虜非漕輓則無粟非征輸則無財是固不可以
言因糧於敵矣然則今日之師可以輕出乎臣以公差在

外南歸旬日遙聞出師竊以爲不必然者何則北地多寒
今炎暑漸熾虜性不耐我得其時一也虜恃弓矢今大雨
時行筋膠解弛二也虜逐水草以爲居射生畜以爲食今
已蜂屯兩月邊草殆盡野無所獵三也以臣料之官軍甫
至虜迹遁矣夫兵固有先聲而後實者今師旅既行然已
無及惟有簡師一事猶可以省虛費而得實用夫兵貴精
不貴多今速詔諸將密於萬人之內取精健足用者三分
之一而餘皆歸聲旣揚矣令之密歸京師邊關固不可知
也是萬人之威猶在也而其實又可以省無窮之費豈不
爲兩便哉况今官軍之出戰則退後功則爭先亦非邊將

之所喜彼之請兵徒以事之不濟則責有所分焉耳今誠
於邊塞之卒以其所以養京軍者而養之以其所以賞京
軍者而賞之旬日之間數萬之衆可立募於帳下奚必自
京而出哉何謂屯田以給食臣惟兵以食爲主無食是無
兵也邊關之輸水陸千里踣頓損棄十而致一故兵法謂
遠輸則百姓貧貴賈則百姓財竭此之謂也今之官軍既
不堪戰陳又使無事坐食以益邊困是與敵爲謀也三邊
之戍方以戰守不暇耕農誠使京軍分屯其地給種授器
待其秋成使之各食其力寇至則授甲歸屯遙爲聲勢以
相掎角寇去仍復其業因以暇日繕完廬所拆毀邊墻亭

僅以過衝突如此雖未能盡給塞下之食亦可以少息輸
餽矣此誠愛人俟時之道王師出於萬全之長策也何謂
行法以振威臣聞李光弼之代子儀也張用濟斬於轅門
狄青之至廣南也陳曙戮於麾下是以皆能振疲散之卒
而摧方強之虜今邊臣之失機者往往以計倖脫朝喪師
於東陲暮調守於西鄙訓無所加兵因縱弛如此則是
陛下不惟不寘之罪而復爲曲全之地也彼亦何憚而致
其死力哉夫法之不行自上犯之今總兵官之頭目動以
一二百計彼誠以武勇而收錄之也則亦何不可之有然
而此輩非勢家之子弟則豪門之實緣皆以權力而強委

之也彼且需求刻剗騷擾道路仗勢以奪功無勞而冒賞
解戰士之心與兵戎之怨爲總兵者且復資其權力以相
後先其委之也其敢以不愛乎其愛之也其肯以不庇乎
苟戾於法又敢斬之以徇于是將軍之威固已因此輩而
索然矣其又何以臨師服衆哉臣願陛下手勅提督等官
發令之日即以先所喪師者斬于轅門以正軍法而所謂
頭目之屬悉皆禁令發回毋使潰後侵冒以撓將權則士
卒奮勵軍威振肅克敵制勝皆原於此不然雖有百萬之
衆徒以虛國勞民而亦無所用之也何謂救患以激怒臣
聞殺敵者怒也今師方失利士氣消沮三邊之戍其亡死

者非其父母子弟則其宗族親戚也今誠無其瘡痍問其疾苦恤其孤寡賑其空乏其死者皆無怨尤則生者自感動然後簡其強壯宣以國恩諭以虜讐明以天倫激以大義懸賞以鼓其勇暴惡以深其怒痛心疾首日夜淬礪務與之俱殺父兄之讐以報朝廷之德則我之兵勢日張士氣日奮而區區醜虜有不足破者矣何謂損小以全大
臣聞之兵法曰將欲取之必固與之又曰佯北勿從餌兵勿食皆損小全大之謂也今虜勢方張我若按兵不動彼必出銳以挑戰挑戰不已則必設詐以致師或捐棄牛馬而爲逃或掩匿精悍以示弱或詐潰而埋伏或潛軍而請

和是皆誘我以利也從而信之則墮其計矣然今邊關守
帥人各有心虜情虛實事難卒辯當其挑誘之時畜而不
應未免小有剽掠之虞一以爲當救一以爲可邀從之則
必陷於危亡之地不從則又懼於坐視之誅此王師之所
以奔逐疲勞損失威重而醜虜之所以得志也今若恣其
操縱許以便宜其縱之也不以爲坐視其損之也不以爲
失機養威畜銳惟欲責以大成而小小挫失皆置不問則
我師常逸而兵威無損此誠勝敗存亡之機也何謂嚴守
以乘敵臣聞古之善戰者先爲不可勝以待敵之可勝蓋
中國工於自守而胡虜長於野戰今邊卒新破虜勢方劇

若復與之交戰是投其所長而以勝予敵也爲今之計惟
宜嬰城固守遠斥候以防奸勤間諜以謀虜熟訓練以用
長嚴號令以肅情而又頻加犒享使皆畜力養銳譬之積
水俟其盈滿充溢後乘怒急決之則其勢并力驟至於崩
山漂石而未已昔李牧備邊日以牛酒享士士皆樂爲一
戰而牧屢抑止之至其不可禁遏而始奮威并出若不得
已而後從之是以一戰而破強胡今我食既足我威旣成
我怒旣深我師旣逸我守旣堅我氣旣銳則是周悉萬全
而所謂不可勝者旣在於我矣由是我足則虜日以匱我
盛則虜日以衰我怒則虜日以曲我逸則虜日以勞我堅

則虜日以虛我銳則虛習以鈍索情較計必將疲罷奔逃
然後用奇設伏悉師振旅出其所不趨趨其所不意迎邀
夾攻首尾橫擊是乃以足當匱以盛敵衰以怒加曲以逸
擊勞以堅破虛以銳攻鈍所謂勝於萬全立於不敗之地
而不失敗敵之道也抑臣所陳非有奇特出人之見固皆
兵家之常談今之爲將者之所共見也但今邊關將帥雖
或知之而不能行類皆視爲常談謾不加省勢有所軼則
委於無可奈何事憚煩難則爲因循苟且是以玩習廢弛
一至於此 陛下不忽其微乞勅兵部將臣所奏熟議可
否轉行提督等官卽爲斟酌施行毋使視爲虛文務欲責

以實效庶於軍機必有少補臣不勝爲國惓惓之至

遵祖法以處外夷疏

胡世寧

近兵部會臣等三法司詳擬分別先今功罪官員等第備
將錦衣衛千戶等官鄭金等勘報其肅事情功罪反復然
詳看得處夷之道未定則辟臣之功罪難別是以彼此牽
持未敢定擬臣愚昧死敢盡言之昔我太宗文皇帝雄
武冠絕古今徼外四夷無不臣服是以北封元之遺孽阿
魯台爲和寧王馬哈木爲順寧王西封脫脫爲忠順王東
北置奴兒干等都司衛所貳百餘處皆以撫綏戎落藩屏
中國至于南討黎李利復古中國之地建立交趾布政司

尤爲偉績宣宗以來黎賊復據交趾殺官劫印不可勝記
阿魯台亦爲馬哈木所併其東北各衛所亦皆蕪併不常
存亡莫考先朝皆置之不問蓋不勞中國以事外夷所
以保我子孫黎民永固基業尤得古聖王推亡固存之道
也乃惟哈密遠在萬里其王脫脫之後已絕自有主國王
母以來三被土魯番殺擄占奪城池廷臣無敢直言請以
先朝處外夷之法處之者乃強求其親黨言罕慎曰陝
巴而立之旋被占奪今其民回回一種久附土魯番爲傾
本國哈刺灰思兀兒生達二種已逃附肅州依我存活不
敢復歸其王彛牙即自願投附土魯番及欲導彼入寇矣

正德年間兵部奏差彭澤總督經畧勅諭番酋速壇滿速兒并火者他只丁款獻還哈密城印將并牙即送回本城居住去并牙即自願歸彼役令守本城亦其臣屬也于我何益又勅令克字刺回還哈密與寫亦虎仙同守城池夫寫亦虎仙爲彼占據哈密而奄克字避難來歸今使之還是驅入虎口也一時廷臣失處如此彭澤素懷忠勇身任其事乃亦依阿不行執奏而苟且行事不終而還責以大臣體國之義不爲無罪也使令土魯番獻還哈密城池忠順王真有嫡派應立之人朝廷與之金印助之兵糧數萬到彼爲王世與之守蓋不過一二年復爲所奪益彼富強

辱我皇命且使再得金印城池以爲後日指勒求索之計耳于我中國何益也夫土魯番變詐多端善爲反問其欲問我附城屬達使之激變則稱哈刺灰畏兀兒稍書交他來其欲問我謀臣使之受罪則稱壞事的都是陳都堂沙的納咱兒前說着來這裏把巴天起發了饋餼米賞賜又言射死人者他只丁惱了人馬往甘州城殺了一日其款使彼番使得通內間再無阻害則稱王子因見漢人殺了火者撒着兒奔馬亦虎仙父子故來報讐天自嘉靖貳年十月進師于夷人已通番文開稱番使被也克力搶了馬又遇達子殺了人速壇滿速兒要動人馬一定來肅州

甘肅三年五月初三日爲亦虎仙子米兒馬黑麻等往甘
州臨行口稱八月裏王子人馬如麻的來聞彼四月已收
八馬八月果至則造意通謀已久豈爲殺彼三人報讐亦
豈爲陳都堂交哈刺灰畏兀兒使之來也其想我後語至
刺爲之後患則言七八月裏領着走刺達子還要殺漢人
地方上去而竟不來其變詐何可信也其自正德六年得
送回伊弟真帖木兒因在甘州久住深州風土好過即起
逆心要來侵犯正德九年即要插旗甘州城門上十年六
月陳九疇方到肅州十一年彼自以原許段子不曾與足
及拘留番使爲名興兵入寇豈因陳九疇也其先三取哈

密城池皆以哈密姦回爲之內應其漸置姦回寫亦虎仙
等親黨曾屋久住肅州城內而又節差番使倒使火者斬
巴思等來探消息爲通書問一旦擁兵徑至城下各回潛
置兵甲圖爲內應使非陳九疇奮身不顧後患即將各回
監故打死而又近遣屬夷劫其營帳遠交左刺搶其城池
使彼開變內顧而還則肅州城池難保無虞臣以爲文臣
之有勇知兵而忘身爲國無如九疇固彼番酋之所深忌
而欲殺也惜其信僚屬之公移輕聽奸回之捏報而妄奏
速誦速牙兒木蘭之殺則其罪有不免耳王邦奇奏其執
殺夷使激啓邊釁又言二次甘肅之亂由殺寫亦虎仙等

之誤蓋彼武夫輕信惑於流言爲彼內間耳至于通貢一節則其後事難料前事可徵弘治四年因其擄去忠順王陝巴六年又犯肅州不服撫處奏准絕貢使一百八十一名盡發兩廣安置十一年因見器用缺乏諸夷歸怨方才悔過送還陝巴嗣後通貢不絕地方騷擾亦不絕而及間內應絡繹于京甘肅之間馴至十一年暨嘉靖三年三次大舉入寇今奏准絕貢又三年矣祇聞來求不聞侵犯者豈其力有餘而心不款也蓋亦懲前二次火者他只丁之被殺瓦剌諸夷爲之後患而長慮却顧也今廷臣議者以有備爲長策以通貢爲權宜其言誠是也臣愚欲乞聖明

特與輔臣熟議今後哈密城池照依先朝和寧交趾捨置不問而唯責彼番酋恭守臣節再無侵犯一二年後方許入貢或止通互市仍約其貢其市皆不許多帶人衆淹留歲月則我之邊城驛途供費可省而得專事邊儲我之謀臣勇將交關不虞而得盡心邊事矣